



Il schurnalist grischun da radio Curdin Vincenz ha survegni a Cuira il premi da radio e televisiun da la SRG SSR Svizra orientala. MAD

Curdin Vincenz – in intermediatur perdert e versà

■ (cc) Il schurnalist grischun da radio Curdin Vincenz ha survegni dacurt a Cuira il premi da radio e televisiun da la SRG SSR Svizra orientala. Cun Curdin Vincenz undrescha la SRG SSR Svizra orientala ina personalitad che fa in schurnalissem pretensius, competent e multifar. Il premi da radio e televisiun da la Svizra orientala ha ina lunga tradiziun. Dotà cun 10 000 francs vegn el surdà dapi l'onn 1952 da la SRG SSR Svizra orientala quasi mintg'onn. Regalà vegn el dals chantuns Appenzell Dador, Appenzell Dadens, Glaruna, Grischun, Son Gagl e Turgovia. A la surdada dal premi a Cuira ha il cusseglier guvernativ Martin Jäger salvà il pled da bainvegni.

20 onns en il servetsch da la SRF

Naschi l'onn 1973 e creschi si a Trimmis sper Cuira è el entrà suenter la terminaziun dal studi a l'Universitad da Berna en ils schurnals regional da la Svizra orientala e dal Grischun. L'onn 1998 ha el midà en la redacziun da novitads a Turitg. Trais onns pli tard è el turnà tar il schurnal regional dal Grischun nua ch'el è stà correspondent grischun fin l'onn 2006. Suenter ha el moderà il magasin da mezdi «Rendez-vous». La fin da l'onn 2011 è el daventà correspondent da Turitg e dapi l'october da quest onn è el redactor da la chasa federala a Berna. Dapi quasi 20 onns lavura Curdin Vincenz tar il radio SRF en las funcziuns las pli differentas.

Vuschs davart la surdada dal premi

«Curdin Vincenz è perdert, sa bler, sa analizar, ma oravant tut sa el declarar ils eveniments en moda originala e cun ligezza uschia che jau pover laic al chapescher», l'ha ses collega dal radio Roland Wermelinger ludà a la festa. «Curdin Vincenz applitgescha virtuosamain tut las furmas radiofonicas dal schurnalissem», ha la presidenta da la giuria Hildegard Jutz motivà la surdada dal premi ad el. Cun Vincenz undreschia la SRG SSR Svizra orientala ina personalitad che fetschia in schurnalissem pretensius, competent e multifar. «Che la giuria m'attestescha tut quests attributs ma fa schont in zic superbi», ha declarà l'undrà.